



**SULTAN IBRAHIM** berkenan mencemar duli mengetuai perarakan sempena majlis sambutan Maulud Nabi, diiringi Tunku Mahkota Johor, Tunku Ismail Sultan Ibrahim (kanan) dan Menteri Besar Johor, Datuk Seri Mohamed Khaled Nordin (kiri).



### LEGASI DEKATI RAKYAT

Mengenai kembara itu, Abdul Rahim berkata ia adalah satu "trademark" bagi institusi Sultan Ibrahim dan ia memberikan peluang bagi Raja berdamping dengan rakyat dan di sebaliknya.

"Inilah satu-satunya raja Melayu yang turun ke padang sekerap yang boleh tanpa protokol untuk bertemu dengan rakyat tiap-tiap tahun. Tuanku memang gemar bermesra dengan rakyat tanpa ada protokol," kata beliau.

Beliau berkata pada masa lain, Sultan Ibrahim turut berangkat bersendirian membeli juadah yang dijual di warung-warung semasa bulan Ramadan dan pergi membuat lawatan mengejut ke kampung-kampung untuk melihat sendiri kebersihan dan keamanan di situ.

"Inilah satu tabiat semulajadi Tuanku dan Raja-Raja Johor dan anak-anak Raja Johor, sentiasa mengambil berat akan kebajikan rakyat. Kita rasa amat bertuah, amat menjunjung tinggi atas keprihatinan dan limpah pandangan Tuanku yang luas kepada rakyat," kata Abdul Rahim.

Beliau berkata Sultan Ibrahim pernah bertitah rakyat negeri Johor terdiri daripada semua bangsa dan dihimpunkan sebagai "Bangsa Johor".

"Dengan adanya kumpulan yang dikatakan Bangsa Johor yang sehati, yang hidup aman damai, bermuhibbah, bersatu padu dan bekerjasama. Itulah satu sebabnya, mengapa negeri Johor terus bertambah maju," tambah beliau.-

**BERNAMA**

## Latar belakang pendidikan

**S**ULTAN Ibrahim diputerakan pada 22 Nov, 1958 di Hospital Besar Johor Bahru dan mendapat pendidikan awal di Sekolah Temenggong Abdul Rahman dan Maktab Sultan Abu Bakar.

Baginda kemudian melanjutkan pelajaran di Trinity Grammar School Sydney, Australia dari tahun 1968 hingga 1970.

Sekembalinya baginda ke Johor, Sultan Ibrahim menjalani latihan asas ketenteraan selama enam bulan di Pusat Latihan Darat sebelum meneruskan latihan "Airborne and Infantry Officers Basic Course" di US Army Infantry School, Fort Benning dan John F. Kennedy Special Warfare Center and School di Fort Bragg, Amerika Syarikat bagi kursus "Special Forces Officer Course".

Ketika menjalani kedua-dua kursus ini, baginda telah menjalankan 11 penerjunan payung terjun dari pesawat pada waktu siang dan lapan kali ketika waktu malam sebelum dianugerahkan "sayap" sebagai komando.

Selain latihan ketenteraan, baginda turut mendapat pendidikan dalam bidang undang-undang dan diplomasi di Tufts University, Amerika Syarikat dan menjalani latihan pentadbiran negeri semasa ditempatkan di pejabat-pejabat kerajaan.